

# La bela storia del pessivendolo Piero Marani



Piero Marani... sora na bicicletta de seconda man... (archiv. Marani)

Tante xe stàe le pessivendole che le 'ndeva par i paisi del Friul a vende pesse, ma ghe gera anca i pessivendoli, òmini che no 'vendo l'inclinassion de fa i pescaùri i ga fato sto mistier cò la stessa bravura de le done. Sta qua, xe la storia de Piero Marani, che 'l ga scumissìo la so atività nel 1945. "Son fio d'arte" el me conta "parchè anca i me genituri i ga fato sto mistier. La prima volta che son 'ndò cò me pare vevo 15 ani, sora 'na bicicletta de seconda man, me go portò avanti pedalando 'na casseta cò 15 kili de sardele. Me pare el me ga subito insegnò che quando vedevo un grumo de case vevo de sigà forte: 'Donèèè! Pessèèè!!!' La prima esperienza la go fata a Campolongo, che gera 'na frassion de Cervignan (Ud), più avanti se trateva de trovà un paese che fasiss par mi, e no gera stò fàcile. La prima sensassion che go provò quando che go vendù pesse a la zente de Villanova dello Judrio, paese de 800 àneme circa, che 'l se trovava tra Manzano e S. Giovanni al Natison, xe stò de veme inbatù cò zente sèmplice, a la bona, e qua me son fermò. Col passà de i ani i tinpi i xe migliorài, e da la bicicletta son passò a la bici col motor, po' a la Vespa, al camionsin, e a la autovettura. Par diversi ani son 'ndò cò sto meso de trasporto rivando a portà da le 15 a le 20 qualità de pesse. Pian, pian, cò la passiansa ghe go insegnò a le done de

casa a cusinà nel modo giusto el pesse fresco che portavo de Maran, tanto che apressàndolo le lo canpreva volentieri. 'Na roba voi sottolineà" el me disì Piero Marani "che tra de naltre pessivendoli vèvomo un gran rispetto riguardo al paese 'ndove che vendèvomo, e lo mantignivomo anca a costo de riportà a casa el pesse che no riussivomo a vende. Sto sistema" el continua a contame cò entusiasmo "el valeva par i pessivendoli seri: la minoransa se no i riussiva a trovà un paese come punto de riferimento, i vendeva 'ndove che capiteva. Pur se gera tinpi de miseria naltre ghe vendèvomo el pesse anca fasendo 'credensa' (sensa soldi) fidàndose, gerèvomo sicuri che la providensa la se dissi de fà no sol par i Santi, quì cò la letera maiùscola, ma anca par naltre, parchè gera zurni che incassèvomo un puchi de schei, altri zurni invesse la gera magra, però a fine ano se acorzèvomo senpre che vèvomo i nostri schei, col vadagno meritò. Te ga de savè, Maria," el continua a contame "che quando 'ndevo ancora in bicicletta e partivomo de Maran a l'una de note, par strada cantèvomo e preghèvomo. Se ne sorprendeve la piova, mi me metevo un vecio capoto de Badolio che 'l pesava 4 kili, ma cò 'l gera pien de aqua piovana el riussiva a pesà anca 20 kili. Cò rivevo a Villanova dello Judrio, trovevo senpre qualche brava persona che la me

lo sfileva dàndome (dopo veme sugò) 'na vecia giaca che la vigniva doprada in stala, cò la zonta de un capèl, vistio cussì se stenteva a cognòssemme. Un zorno 'na siora titubante la me ga dito: – Sei tu, Pitro, o lei è un altro pessivendolo? – Son mi, son mi, siora, – ghe go risposto soridendo par sta domanda. Col passà de i ani vevo instaurò cò la zente del posto 'na granda familiarità, tanto che i me domandava senpre notissie de casa, po', 'vendo savùo che me mare la gera restada védova cò sinque fioi, i me regaleva musiti, salami, farina, vuvi, verdure e altro... – Prendi, i me diseve, porta questo a quella povera dona di tua madre. I faseva questo pur no 'vèndola mai cognossù! Xe stò 'na fameja che par ben 40 ani, a mesozorno la me ga dò senpre el disnà, senza volè niente in ganbio, àcetando sol qualchi volta un meso kilo de pesse. Ghe xe ancora un bel tòco che voi contate," – el me disì Piero – xe stò un periodo de la me vita che me gera calada la vose e go vesto l'idea de conprame un altoparlante e registrà ste parole: – Pronto, pronto, xe rivò sul 4° Binario el pessivendolo proveniente da Marano Lagunare, con il pesce buono e fresco!!! – Le done sintindo la me vose subito le vigniva fora de casa e le se avvicineva a la me autovettura par conprà el pesse. Quando che go cessò l'atività, ghe go cedùo a me cugnò sto mio paese, (mio... se fa par modo de di) e ancora 'desso el miti sta mia registrassion, parchè la zente la la vol, se 'l parla lu i reclama e i fa fadiga a vignì fora de casa. Credo," el me disì concludendo "che naltre pessivendoli de un tenpo, semo stài i pionieri del Friul e de le altre province, vendendo pesse vèvomo portò con elo la cultura del cusinalo e de gustalo!"

Concordo con lu savendo come nel tenpo atual el nostro pesse el gabia vesto un grand apressamento in duti i mercati italiani e èsteri. "Nel 1992, go smesso par motivi de fameja, l'atività, ma posso assicurare" el me disì cò un velo de malinconia "che squasi dute le note sogno de gesse a Villanova dello Judrio a vende ancora pesse. Anca se volissi desmentegà quele care persone sarissi impossibile, parchè ghe go volesto veramente ben, e luri penso che i me ni gabia volesto a mi. Infatti ancora 'desso a distansa de ani, in diverse maniere i se fa vivi volendo savè mie notissie". Sta bela storia la lassa in cuor bei sentiminti: no resta che ringrassiate, Piero, par vè onorò el "tuo", el nostro paese.

Maria Damonte